

Mama...

Dòs ist de mama ver mi
ont ver vil òndra abia i,
nèt lai a baib
ober a "groases" baib.

Van earst to as de boas as de pist
sai' hèrz gònz ver di ist.
Ver nai'n mu'net hearz e de drinn,
du barst ver òlbe sai' sai' kin.

Endarbeil as de bòrtet as de geast au
parootet se a deckl za leing der drau,
si mòcht er kappler ont jackler za hòltn der bòrm,
ober zan leistn s bermest sai' de sai'na òrm.

Van sèll to as de geast au
si tuat petn ont schauk anau.
Si hòt er gem s lem
ont ver òlbe bart se se gem.

Benn as de krònk pist ber bòcht?
De mama, ver a gònza nòcht.
Benn as de tschual geast ber hilf der?
Gor lesn ont schraim hilf s e der.

De reckt au de dai'na hantler vour za gea en pett,
de ist si de earst as leart der s gapètt.
Òlbe offet vinnst de sai' tir,
òlbe gareck de sai'na òrm keing diar.

Zbischn tausnt lait si kennt de dai'stim,mm,
ober moa' nèt za vinnen linn!
Mear as a vòrt barts se der gor straitn miasn,
valn tuast nia men de tuast sa si lisnen.

De ist òlbe pet diar en guat ont en tschlècht,
si viert de ont leart der en be garècht.
De sògt der gor sèll as de billst nèt hearn,
darmit as de sellst as n guat be zua kearn.

De mama ist òlbe schea,
gor benn as de zait tuat gea,
sai' hor kimmp bais de sai'na tschòtt'n mia
ober va na sògs se der si nia.

S hèrz is es si van haus,
en sèll to as de ver òlbe geat ka tir aus
barst sechen en himbl a'ne sunn,
a'ne bòsser er dai' prunn.

En sèll to as de glocken laitn ver si
gor a stickl va diar ist pet si hi'.
Ver òlbe bars sa du gadenken
ont s dai' gapètt barstn schenken.

Ober sai' liachtl bart nia stèrm,
de hòts n en de sai'na kinder gem.
Òlls sèll as de si hòt er gem,
barst prauchen ver en gònz lem.

Mama mama a bell a bourt!
S earst as de va kloa' learst
ont s leist as de riafst
benn as de du hoa'm kearst!

Tata ...

Dòs ist der tata ver mi
ont ver vil òndra abia i.
nèt lai an mònn
ober an "groasn" mònn.

Baita òcksln ont groasa hènt,
an mònn as mia koa'na kennt.
Van òlls kònn er er tea',
du schau za tea'n en òlbe no gea.

Der nimmt de kan an hantl va kloa',
du kònnst sai' gabiss as der lòt e nia aloa'.
Der leart der òlls sèll as der boas,
ver de sai'na kinder der kummer ist groas.

Der hilft der òlls sèll as der kònn
za mòchen de kemmen an rèchtn mònn.
Der plaipst der no ont hòt de gearn,
kann im barst du òlbe zua kearn.

Der òrbetet va vria finz nòcht
ont kennen tuat er nèt koa' vorcht.
Van òlls bart er er òlbe tea
darmit as sell òlls guat gea.

An to no en ònder du kimmst groas,
schau za gem en nia an groasn loat.
Gor benn as der ist òlt ganua
van sai'na beirter hòt men nia ganua.

Benn as de kloa pist sichst n groas ont stòrch,
benn as de groas pist sichst n òlt ont schbòch.
Ober drin is òlbe der glaich,
òlt kemmen ist nèt òlbe laicht.

S bart kemmen der to as der ist nich mear bèrt,
gadenk as ist gor gèlzgott en im men de do pist as doi'bèlt,
lònn en nicht valn du aa,
asou abia der gatun hòt er aa.

An to barstn du ver òlbe miasn griasn
ont vargèssn barstn du nia miasn.
En dai'hèrz bart er er òlbe plaim,
dòs muas i schraim.